

MISTERIOS DOLOROSOS

(Sei reza iha terça no sexta feira)

Hodi Padre..

Intro: Maluk sira, Bispo Fulton J. Sheen dala ida dehan nune'e. " Wainhira remata orasaun Tersu Missionaro nian, ita hakuak tiha ona kontinente tomak no ema hotu presente iha orasaun ida nee. Mai ita reza Tersu Missionaria ho laran manas no hala'o mandato Missionaria Maromak nian, ita nia knaar serbi nian ho ksolok.

Orasaun: Aman laran diak, Ita bolu no haruka ita nia Kreda atu halo moris Ita nia reinu iha mundu raiklaran, hodi haklaken rahun diak Evanjelu nian no luta ba kriasaun tomak nia diak. Hamutuk ho Maria Virjen Ita Oan Jesus Kristu nia inan, ami harohan halakan laran manas misionaria sarani sira nian. Haforsa no tulun ami atu badinas nafatin hodi serbisu hamutuk no kreativu haklaken ita Lia Foun Diak iha povu sira nia le'et, liu-liu iha momentu Covid-19 ida ne'e. **Ami harohan ne'e hodi Na'I Jesus Kristu Nia naran hamutuk ho Espirito Santo. Amen**

Misterio 1: Ita sei hanoin katak Jesus neon sala, halo orasaun iha toos Oliveira nian. *(Tersu musan kinur ba Asia)*

"Ha'u Aman, bele karik, hadook tiha kalis ne'e housi Ha'u; maibe halo tuir Ita hakarak ba, la'os ha'u nian."

Ita reza ba Kontinente Asia (Nonok oituan)

Orasaun: Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Asia, ne'ebe hetan problema oin-oin iha sira nia moris, ne'ebe laiha hela fatin, ekonomikamente hetan situasaun a'at liu, tradisaun no moral, la rekoñese sira nia direitu umanu; haraik ba sira forsa, laran manas, no atu sira nafatin fiel no metin iha fiar no ba Ita nia hakarak. Halo sira aprende no hetan kbi'it husi Ita Oan Jesus. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

Ami Aman, Ave Maria 10, Gloria

Misterio 2: Ita sei hanoin katak ema Judeu sira futu Ita Na'i Jesus Kristu, baku nia isin, halo mesa kanek. *(Tersu musan azul ba Oseania no Australia)*

Sira baku Niaulun ho fafulu ida, tafui ba Nia, no hakneak iha Nia oin hodi hanai Nia. Hasara tiha Nia, sira hasai hena mean, tau fali Nia hatais.

Ita reza ba Kontinente Oseania no Australia (nonok oituan)

Orasaun: Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Oseania no Australia. Atu sira ne'ebe hetan persegisaun tanba sira nia fiar, Ita boot haraik kbiit no konsolasaun. No ba martir (mate mean sira) ne'ebe defende fiar no mate tan ema oho sira iha kontinente Australia no Oceania durante funu mundial daruak nian, atu fini fiar nian ne'ebe sira kuda tiha ona sei la para maibe bura nafatin. Continua tulun sarani sira atu fiel hodi moris tuir vokasaun nu'udar Kristu nia dixipula, maski tenke terus wain tanba sira nia fiar. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

Ami Aman, Ave Maria 10, Gloria

Misterio 3: Ita sei hanoin katak ema tau aitarak ba Jesus nia futarulun. (Musan kor mutin ba Europa)

Sira tau ba Nia hena mean ida. Sira leu ai-tarak, tau ba Niaulun. Tuir mai, sira kumprimenta Nia dehan, “Viva, liurai Judeu sira nian!”

Ita reza ba Kontinente Europa

Orasaun: Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Europa, atu Kristaun sira hotu ne’ebé hetan persegisaun tanba fiar, ema hewai, ema la fo folin ka la konsidera, hetan kbi’it, konsolasaun, metin iha tentasaun, no iha esperansa foun. Atu naroman Evanjelu nian bele haroman no gia ain hakat hotu moris loron-loron nian, atu sira metin iha tentasaun oin-oin ne’ebe sira hasoru. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

Ami Aman, Ave Maria 10, Gloria

Misterio 4: Ita sei hanoin katak Jesus lori nia krus, hodi ba to’o foho Kalvario. (musan mean ba Amerika)

Tuir mai Judeu sira lori Jesus no Nia sai ba liur hodi Nia lori nia krus iha nia kbaas ba fatin ida naran “ulun ruin,” nebe dehan iha lia Ebreu “Golgota.”

Ita reza ba Kontinente Amerika

Orasaun: Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Amerika, atu sira bele haka’as an no ho fiel lori kruz iha mundu ida ne’e nia realidade. Halo sira koñese tebes Ita Oan Jesus, liu-liu iha ninia misteriu terus nian. Atu Ita nia sarani sira iha Amerika bele hasoru duni Jesus ne’ebe moris, nu’udar dalan ba konversaun, fraternidade no solidaridade. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

Ami Aman, Ave Maria 10, Gloria

Misterio 5: Ita sei hanoin katak ita Na’i Jesus Kristu hedi netik iha krus, terus to’o mate tanba ita. (Musan verde ba Afrika)

Jesus hakilar ho lia maka’as: “Aman, iha Ita liman Ha’u saran Ha’u nia klamar!” Dehan tiha ne’e, Nia iis kotu.

Ita reza ba Kontinente Afrika

Orasaun: Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Afrika, ba sira ne’ebé la hetan atensaun ba sira nia dignidade no direitu pesoal, sira ne’ebé hamlaha no sira ne’ebé hamro’ok atu hetan moris ne’ebe diak liutan. Atu Ita

nia Kreda bele haka'as an manan lialos ba sira, difende sira ne'ebé ema hewai, terus, sira hotu ne'ebé lian laiha, no la hetan sira nia direitu. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

Ami Aman, Ave Maria 10, Gloria

Orasaun Final

Aman, hun domin nian, ami agradese ba tersu misionariu ida ne'e. Atu hodi Ita nia grasa, ami sai atenbrani liutan hodi haklaken Ksolok Evanjelu nian no bele to'o iha moris fraterna loron-loron nian. Halakan ahi domin nian ba ami nia maluk sira to'o ami bele sai ida iha moris rohan laek. Ami harohan ne'e hodi Ita nia Oan Jesus Kristu, Nia naran hamutuk ho Espirito Santo. Amen

(Ámbitu Misaun)